

Intgantiar ils giuvens cun novs cuntegns

Berna, ils 2 da settember 2021. Il Content Board da la SRG SSR lantscha ina concurrenza d'ideas en connex cun il tema «20/20: Co èsi da viver cun 20 en ils onns 2020?». La SSR tschertga cuntegns ch'ella po sche pussaivel mussar sin tut sias plattafurmas. La concurrenza dura fin ils 15 d'october 2021.

La pandemia è ina cesura profunda en la vita ed il svilup da la generaziun giuvna. Las midadas furman la basa per numerusas istorgias e per ina discussiun naziunala davart las circumstanzas da viver e las perspectivas per l'avegnir da Svizras e Svizzers. Il Content Board da la SSR sa concentrescha perquai l'auter onn sin las giuvnas ed ils giuvens ed intimescha producentas svizras e producentes svizzers sco era collavuraturas e collavuratur da la SSR d'inoltrar ideas e concepts en emprima lingua per in public giuven. Temas pussaivels èn per exempel la diversidad culturala, perspectivas professionali, perspectivas d'abitar, models da viver u la mobilitad.

La finamira da la concurrenza è d'enritgir la purschida da program naziunala da la SSR e da sias unitads d'interpresa SRF, RTS, RSI e RTR cun cuntegns innovativs ed originals che sa drizzan cunzunt ad in public giuven. La SSR è a la tschertga d'ideas che derivan da tut las regions da la Svizra e sustegna en quella moda la creaziun audiovisuala ed il svilup d'istorgias che sveglian l'interess e la meraviglia per temas unics che han in connex cun la Svizra. Cun questa concurrenza dat la SSR era la pussaivladad a novs talents da sa profilar cun lur projects linears u digitals.

Premissas per participar a la concurrenza

Participar a la concurrenza pon producentas e producentes cun in domicil da fatschenta en Svizra e collavuraturas e collavuratur da la SSR. I vala da resguardar las suandantas premissas:

- **Gener:** Il cuntegn e la furma èn averts.
- **Moda da produenziun, lunghezza e furma dal raquint:** Il format è liber. El duess però resguardar las modas d'utilisaziun da la gruppa en mira sin il chanal respectiv.
- **Per tut ils chanals:** Ils cuntegns duessan vegnir elavurads per audio e video, radio, televisiun, purschidas online, purschidas linearas e non-linearas inclus plattafurmas da terzs.
- **Concept:** Vus pudais inoltrar concepts serials e betg serials sco er ideas per events en directa.
- **Lingua:** Il project permetta ina realisaziun en tut las linguas naziunalas.
- **Public en mira:** Ils cuntegns duain cuntanscher en emprima lingua in public en mira pli giuven – da 18 fin 29 onns ubain da 30 fin 45 onns.

Inoltrar ideas fin ils 15 d'october 2021

Vus pudais inoltrar vossas ideas **fin ils 15 d'october 2021 exclusivamain via il [Formular](#)**.
Necessarias èn las suandantas indicaziuns:

- biografia curta da la producenta/dal producent u da l'autura/l'autur
- formulaziun da l'idea en ina frasa
- concept general cun sinopsa, motivaziun ed ina curta descripziun dal project inclus in plan da producziun e plattafurmas resp. chanals da distribuziun potenzials
- stimaziun approximativa dals custs

Cun inoltrar ils documents sincerais vus che las ideas preschentadas èn libras da dretgs da terzas personas. En cas d'in consentiment da producziun obtegna la SSR tut ils dretgs al project. La SSR po acceptar sulettamain projects che pon vegnir publitgads enfin la fin dal 2022. Ils projects tschernids obtegnan in'incumbensa da producziun cun ils meds respectivs (max. CHF 500'000).

Ils projects tschernids vegnan preschentads ils 15 da november 2021

Il Content Board tscherna las ideas ed ils projects adattads per ina preschentaziun. Quella ha lieu ils **15 da november 2021**. Reservai p.pl. questa data! Ils detagls davart la moda da preschentaziun suondan pli tard. Projects tschernids definitivamain basegnan in concept en detagl e la calculaziun dal budget. **La SSR surdat l'incumbensa enfin la fin dal 2021.**

Il Content Board da la SSR

Il Content Board da la SSR dirigia il svilup publicistic da la SSR tranter las regiuns. La rait ha la finamira

- da promover cun la purschida da program la chapientscha, la coesiun ed il barat tranter las differentas parts dal pajais (coesiun),
- d'illustrar a moda publicistica la diversidad culturala, sociala, geografica e politica da la Svizra (promoziun da la diversidad) e
- da sviluppar e producir projects naziunals en tut ils genres e per tut ils vecturs (svilup dal cuntegn naziunal).
- Dal Content Board fan part da SRF Stefano Semeria (president) e Roland Mägerle, da RTS Philippa de Roten, Serge Gremion, Christian Zurbuchen e Thierry Zweifel, da RSI Enrico Carpani e Cathy Flaviano, da RTR Flavio Bundi sco era Manuel Kollbrunner e Jessica Morley da la Direcziun Svilup e purschida da la SSR.

Ulteriuras dumondas pudais vus drizzar a la suandanta adressa dad e-mail:

Content.Board@srgssr.ch.